



Senin, 29 Maret 2021
Ogen: Galatia 6:2-5



La Mediate



Lit sada penulis si mbandingken apaikin dosa si mbelinna antara sombong ras la mediate. Situhuna banci saja duana biak enda sikawiten, lit sebab ras akibatna. La sitik hal sijadi ibas sekelewetta, kalak mesera erkiteken perbeben ekonomi, ngenanami kiniseran erkiteken itindas ntah pe erbage kecelakan iadepenta, tapi sitik pe idiate, iakap sebage la urusenta. Adi sombong, eme biak sierpengakap ia lebih asangken kalak sideban. Elie Wiesel ngatalen maka belinen dosa la mediate asangken sombong. Banci saja secara la langsung kalak la mediate mpediat kalak silit ibas bencana, kiniseran, kecelakaan 'mate' erkiteken la isampati amin lit kesempatan guna nampati ras mulahi kalak si ibas perbeben e tapi la ilakokenna.

Kegeluhén kalak si tek la banci mpebelin biak 'gundera sala gundera buluh belin kubenturi, kutera kalak kutera beltekku simbelin ku besuri'. Amin biak sibage nai nari enggo lit ibas masyarakatta, tapi e labo mehuli, la ngena ate Dibata. Rasul Paulus pe mpersingeti perpulungen Galati gelah sada ras sidebanna saling mperdiateken, sisampat-sampaten, sitatang tatangen ibas kerina dampar kegeluhén si man baban. Eme undang-undang Kristus si arus sisehi asa ngasup gegehta sabab Kristus pe enggo mere dirina maba baban geluhta si dem alu dosa.

Kuga pe gegehna kita, perlu nge kita man sampaten, uga pe bayakna ras buena ertata, perlu nge kita kalak sideban amin musil kal pe ia. La kerina banci itukur salu duit. Uga ka pe jilena rupata, e bekas Dibata nepa nge janah kuga pe ganjangna pangkatta lit paksana arus sipulahi. Emaka perlu kal siasah, si latih biak mediate sabab e jadi ulu keleng ate ras nampati kalak sideban.